

# Regenza vul Institut naziunal

Il Grischun aspiescha per obtegnair la sedia dal nov Institut naziunal per plurilinguitad

DA MARTIN CABALZAR

■ Il Grischun sco sulet chantun triling da la Svizra e sco sulet chantun nua ch'i vegn pledà rumantsch saja predestinà sco sedia dal nov Institut naziunal per plurilinguitad. Questa pretensiun fa la regenza grischuna en connex cun la nova lescha da linguatgs sin plaun federal.

Il nov artitgel da linguatg en la constituziun federala pretenda da la confederaziun in engaschament pli grond e pli vast per promover ils linguatgs naziunals e la chapientscha vicendaivla. Tranter auter vegn postulà la creaziun d'in Institut per la plurilinguitad. Tenor il minister da cultura *Claudio Lardi* duai il nov institut esser ina instituziun scientifica che collavura cun auters instituts da perscrutaziun activs sin quest champ. Ultra da quai possia l'institut er surpigliar incaricas da documentaziun e d'infurmaziun.

Sco quai che Lardi ha respundi ad in postulat da deputà *Romedi Arquint* dispona il Grischun gia oz da structuradas adattadas per garantir e promover las cumpetenzas plurilinguisticas. Lardi enumerescha concretamain: Las scolas publicas rumantschas e talianas, la purschida d'ina maturitad bilingua en divers gimnasias, la furmaziun da magisters e la produziun da meds d'instruc-



La regenza sustegna la creaziun d'in Institut da plurilinguitad cun sedia en il Grischun.

LQ

ziun en diversas linguas. La regenza è persuadida ch'il Grischun porscha per quest motiv era bunas premissas sco lieu per la perscrutaziun da la plurilinguitad.

## Novs impuls si da Berna

Sco la regenza grischuna scriva en sia pusziun pertutgant la lescha da linguatgs spetga ella che la confederaziun mantegna vi-

navant las mesiras existentas e ch'ellas vegnian cuntinuadas. Ultra da quai postulescha la regenza che la confederaziun tegnia quint e sustegna las relaziuns specificas dal retorumantsch che è smanatschà spezialmain e prendia resguard da las exigenzas specificas d'in chantun triling. «Cun las instituziuns existentas e cun ils meds actuals n'èsi betg pussaivel da corresponder a quest gia-

visch», constatescha la regenza. Perquai pretenda ella da crear ina instituziun per plurilinguitad en furma d'in institut u center da cumpetenza en l'intschess dal Grischun. Quest institut naziunal duai vegnir collià cun instituziuns sumegliantas dad autras regiuns e gruppas linguisticas. La lescha federala da linguas che è actualmain en consultaziun duai entrar en vigur l'onn 2003.